



Samþykkt fyrir Listasafnið á Akureyri

I. Nafn, heimili, tilgangur og verkefni

1. gr.

Listasafnið á Akureyri er í eigu Akureyrarbæjar og starfar í þágu almennings. Heimili þess er að Kaupvangstræti 8-12 og varnarþing er á Akureyri. Rekstrarkostnaður safnsins greiðist úr bæjarsjóði í samræmi við fjárhags- og starfsáætlun ár hvert. Safnið er ekki rekið í hagnaðarskyni. Ef hagnaður verður af rekstri rennur hann til safnsins sjálfs.

2. gr.

Starfssvæði Listasafnsins er Akureyri og nágrenni. Viðfangsefnið er myndlist og hönnun. Listasafnið á Akureyri sér um rekstur þeirra stofnana og starfsemi sem Akureyrarbær rekur í húsum sínum í Kaupvangsstræti sem í daglegu tali er nefnt Listagil. Auk Listasafnsins eru það: Ketilhúsið, gestavinnustofur Listasafnsins og vinnustofur listamanna og félaga í gílinu. Listasafnið lýtur gildandi safnalögum, siðareglum ICOM og lögum um menningarminjar hvað varðar minjavörslu eftir því sem við á.

3. gr.

Hlutverk Listasafnsins á Akureyri er að safna, varðveita, skrá og rannsaka m.a. listaverkasafn Akureyrarbæjar og standa fyrir sýningum á sjónlistum af innlendum og erlendum uppruna. Safnið skal ennfremur miðla upplýsingum um safnkostinn og hafa til sýnis á áhugaverðan og aðgengilegan hátt fyrir almenning. Safnið getur haldið sérsýningar hvar sem safnmunir eru öruggir og lánað muni til sýninga með skilyrðum um öryggi þeirra. Safnmuni skal skrá eftir viðurkenndum aðferðum og varðveita og forverja eftir bestu getu. Safnið skal starfa eftir mótaðri söfnunar- og sýningarstefnu sem skal miða að því að varpa ljósi á og efla þekkingu, skilning og áhuga almennings á sjónlistum. Listasafnið miðlar þekkingu á sviði myndlistar og hönnunar. Söfnunarstefnu skal endurskoða á fjögurra ára fresti. Safnið skal leitast við að höfða til og þjóna breiðum hópi safngesta og hafa starfsemi sína aðgengilega öllum.

4. gr.

Meginmarkmið safnsins eru:

- Að setja með reglulegu millibili upp sýningar á safnkosti eða sýningar tengdar honum í húsnæði Listasafnsins.
- Að standa fyrir margvíslegum viðburðum sem hafa það að markmiði að hlutverk safnsins nái fram að ganga.
- Að hafa öflugt samstarf við listafólk, önnur söfn innanlands sem utan og við aðrar viðurkenndar stofnanir um málefni sem varða starfsemina.
- Að hafa umsjón og eftirlit með myndverkum á almannafæri og í eigu bæjarins.
- Kappkosta skal að sem mest af safnkosti sé til sýnis dagsdaglega í stofnunum Akureyrarbæjar.

5. gr.

Listasafnið á Akureyri skal vera opið almenningi á auglýstum tíma. Safnið skal sinna fræðsluhlutverki til skóla á starfssvæði sínu sérstaklega og skal hafa samvinnu við fræðslufirvöld, ferðaþjónustu og aðra aðila eftir því sem við á.

II. Stjórn

6. gr.

Bæjarráð starfar sem stjórn Listasafnsins og er starfstími stjórnarmanna hinn sami og bæjarstjórnar. Bæjarráði er heimilt að skipa þriggja manna listasafnsráð sem hafa skal sama skipunartíma og stjórnin. Hlutverk listasafnsráðs er að vera ráðgefandi um fagleg málefni safnsins s.s. listræna starfsemi, sýningaráætlanir, safna- og sýningarstefnu. Safnstjóri geri tillögu að einum fulltrúa til setu í listasafnsráði, bæjarráð tilnefnir einn fulltrúa og SÍM, Samband Íslenskra myndlistarmanna gerir tillögu að einum fulltrúa. Þekking á safnastarfsemi er kostur. Auk þess er fulltrúi starfsfólks Listasafnsins áheyrnarfulltrúi með tillögurétt á fundum listasafnsráðs. Listasafnsráð annast jafnframt innkaup listaverka sbr. 15., 16. og 17. gr. þessarar samþykktar.

7. gr.

Um starfshætti og fundi bæjarráðs fer skv. samþykkt bæjarráðs sem sett er af bæjarstjórn Akureyrar.

8. gr.

Bæjarráð afgreiðir starfs- og fjárhagsáætlun Listasafnsins fyrir hvert ár og fylgist með framkvæmd hennar. Um leyfi til undirritana skuldbindinga fer skv. reglum Akureyrarbæjar.

9. gr.

Bæjarráð gerir tillögur um stefnumörkun í samvinnu við safnstjóra. Bæjarráð tryggir framkvæmd og reglulega endurskoðun þeirrar stefnu hjá safninu. Bæjarráð hefur yfirumsjón með því að Listasafnið starfi samkvæmt skipulagsskrá og almennum lögum.

III. Safnstjóri

10. gr.

Sviðsstjóri þjónustu- og skipulagssviðs ræður safnstjóra Listasafnsins á Akureyri eftir umsögn bæjarráðs. Um ráðninguna fer skv. reglum Akureyrarbæjar. Safnstjóri annast daglegan rekstur Listasafnsins. Safnstjórinn skal hafa háskólamenntun á sviði sjónlista eða búa yfir sambærilegri þekkingu. Safnstjórinn ræður annað starfsfólk í samræmi við samþykktu starfs- og fjárhagsáætlun. Safnstjórinn er ráðinn til fimm ára. Bæjarráð getur ákveðið að framlengja ráðningu safnstjóra einu sinni til fimm ára.

11. gr.

Safnstjóri ber ábyrgð á rekstri safnsins og stjórnarsýslu þess þar með talið fjármálum og framkvæmdum ákvarðana bæjarráðs. Fagleg starfsemi er á hans ábyrgð sem og skipulagning sýninga. Safnstjóri ber ábyrgð á viðhaldi búnaðar og húsnæði í samráði við bæjarráð og umhverfis- og mannvirkjasvið.

12. gr.

Safnstjóra er heimilt að lána gripi tímabundið út úr safninu til sýninga innanlands. Safninu er ekki heimilt að veita viðtöku gjöfum sem sérstakar kvaðir fylgja, nema með samþykki stjórnarinnar. Heimilt er að selja listaverk í eigu safnsins í því skyni að kaupa önnur verk sem þykja æskilegri fyrir það. Sala er þó aðeins heimil með samþykki bæjarráðs og í samráði við viðkomandi höfuðsafn, sbr. 12. gr. safnalaga nr. 141/2011. Óheimilt er að selja eða að láta af hendi verk sem þegin hafa verið að gjöf.

IV. Reikningur og endurskoðun

13. gr.

Um reikningshald Listasafnsins á Akureyri fer skv. reglum Akureyrarbæjar og annast endurskoðendur bæjarfélagsins endurskoðun reikninga þess.

14. gr.

Bæjarstjórn Akureyrar samþykkir ársreikninga bæjarins eftir að endurskoðun lýkur og þar með reikninga Listasafnsins á Akureyri.

V. Listaverkakaup og gjafir

15. gr.

Listasafnsráð annast kaup listaverka til safnsins í samræmi við fjárheimildir í fjárhagsáætlun Akureyrarbæjar. Þá getur safnstjóri ráðstafað allt að 20% af ráðstöfunarfé til kaupa innlendra verka án afskipta nefndarinnar. Meirihluti atkvæða ræður úrslitum mála. Verði ágreiningur um kaup listaverks milli safnstjóra og annarra nefndarmanna skal skjóta málinu til bæjarráðs til endanlegrar ákvörðunar.

Við val listaverka til safnsins ber að fara eftir listrænu gildi þeirra.

Listasafnsráð skal einnig vera til ráðgjafar um listaverkakaup stofnana bæjarins. Listasafnsráð skal árlega gera bæjarráði grein fyrir innkaupum listaverka og listaverkagjöfum sem borist hafa til safnsins. Laun listasafnsráðsmanna skulu greidd af fjárveitingu til Listasafnsins á Akureyri.

16. gr.

Listasafnsráð fjallar um gjafir sem safninu eru boðnar og metur hvort þær skuli þegar. Þótt safnið veiti listaverki viðtöku sem gjöf má það eigi takast á hendur kvaðir um aðra meðferð þess en annarra listaverka safnsins; þó getur bæjarráð veitt undanþágu frá þessu ákvæði ef sérstök rök mæla með því. Gjöf skal fylgja gjafabréf. Gjafir og fjárframlög til safnsins eru frádráttarbær til skatts, sbr. ákvæði laga um tekjuskatt nr. 75/1981, með áorðnum breytingum.

VI. Um myndverk á almannafæri

17. gr.

Listasafnsráð annast kaup myndverka til uppsetningar á almannafæri í samræmi við fjárheimildir í fjárhagsáætlun Akureyrarbæjar.

18. gr.

Safnstjóri gerir tillögur um staðsetningar myndverka á almannafæri að höfðu samráði við skipulagsfulltrúa Akureyrarbæjar og umhverfis- og mannvirkjasvið.

Ef ætlunin er að staðsetja myndverk sem verður jarðfast og varanlega skeytt við landið, s.s. á miðbæjarsvæði eða þar sem ásýnd þess verður mjög sýnileg og mun setja svip sinn á umhverfið, skal jafnframt hafa samráð við bæjarráð.

VII. Niðurfelling starfsemi

19. gr.

Ef starfsemi Listasafnsins á Akureyri leggst af skal safnkostur þess renna til bæjarsjóðs Akureyrar að höfðu samráði við höfuðsafn. Munir þeir sem að láni hafa verið fengnir, verða afhentir lögmætum eigendum, öðrum eigum skal ráðstafað að höfðu samráði við ráðuneyti.

VIII. Breytingar á samþykkt

20. gr.

Samþykkt þessari getur bæjarráð breytt en allar breytingar skulu staðfestar af bæjarstjórn Akureyrar.

Samþykkt í bæjarstjórn 18. apríl 2023